

" O C'HORTOZ AR GOANAG EVURUS "

Ke Muioc'h mui e traoñ da soñjal ne dleer ket kompren kelc'hiad Nedeleg dindan ur soñj istorek bennak. N'eus den anaoudek awalc'h war liderezh an Iliz a gredfe lavarout c'hoazh ez eo an Azvent penn kentañ lid an Amzer. Sul ar Septuajezim an hini eo a verk gant lennadenn ar C'heneliezh er Brevial, deroù istor an den e suliou ar bloaz, ken anat m'eo deus kredet liderezhourion 'zo lakaa bloavezh al Lidou da gregiñ gant sul ar Septuajezim e-unan.

Zoken, hep sellout malz ouzh oferennoù an Azvent, e weler diouzhtu ne heulient urzh istorek ebet. Aviel fin ar bed en em zibun er sul kentañ, e-pad ma komzer eus Yann Vadezour er suliou war lerc'h, ha c'hoazh oc'h eilpennañ an urzh istorek diwar e benn, peogwir e weler anezhañ prizonet araok e welout e prezeg. Hep kentañ ma teu avielou an dapuzek deizioù da gomz eus ar C'helioù Mat d'ar Werc'hez hag eus he gweladenn da Elizabed.

A-hed kelc'hiad Nedeleg e c'hellfemp evit gwir ober an hevelep evezhiadennoù, dapust ma plijfe d'an dud 'zo renkañ un tammig an traoù, ha sklaeraat un tammig pezh a gav dezho bezañ ul luziadenn. Ganedigezh hor Salver d'ar 25 a viz kerdu, hen gouzout a reomp, ne venn ket merkañ an amzeriad istorek; kemeret eo bet an deiziad-se evit abegoù all, spleitus ha skeudennel, da ziskouez ar C'hrist evel ar gwir heol paret war ar bed ha dellezek e-unan hepken da vezañ azeulet.

(o)

Ret eo dimo eta klask da gelañ kelc'hiad Nedeleg ha d'an Azvent ennañ, ur pennvenezh all. Bez 'e tleomp dizoleiñ ennañ misterioù estr eget hini an amzer, estr eget mennad trugarezus ha salvus Doue o'n em zisplegañ war linenn ar c'hantvedoù. Nedeleg a vo kentoc'h gouel ar Verb, gouel ar sklerijenn o parañ, gouel ar Gomz o tont da chom enomp hag oc'h ober ac'hanomp advibion an Tad, kentoc'h eget eñvoradur an darvoudoù c'hoarvezet e Betlehem. Ha c'hoazh ne vennañ ket gant ur frazenn hepken, diskleriañ holl binvidigezhioù Nedeleg.

An Azvent ivez a zo da gemer en ur soñj ledan. An Azvent ivez stegnet holl war du Nedeleg, a zo evel Nedeleg lid ar vuhez kevrinus. N'eo ket da lavarout e vefe kelc'hiad Pask liderezh goull. Penaos e c'hellfe mister bras hon daspren bezañ didalvoud evit an eneoù? Penaos e sellout ouzh mennad trugarezus an Tad en hor c'heñver, chom hep tennañ brasañ frouezh dioutañ evit hor vuhez speredel. Kelc'hiad Pask koulakoude a seblant din bezañ ahelet war ur soñj izeloc'h eus ar vuhez speredel: ar pec'hed hag e zaspren gant Pask ar C'hrist, gant labour an Iliz dindan lusk ar Spered. Hogen gant kelc'hiad Nedeleg eo barr ar vuhez speredel, eo ar vuhez kevrinus, eo ar c'harismoù/ (sell. ouzh abostol an eil sul goude an Epifaneta)

Un dra klasel eo lavarout ez eo an Azvent lid pep donedigezh eus an Aotrou, an donedigezh tremenet, an hini 'vremañ, an hini da-zont. Ha gwir eo. Met n'eo ket awalc'h. Se 'zo chom c'hoazh en un doare istorek da welout ar mister, en un doare evel diavaezel ha rakvoudel. Sklerijenn ispisial an Azvent ha Kelc'hiad Nedeleg a seblant din bezañ dreist-holl diabarzhel hag envoudel : amañ emañ pep tra dindan gras ar gnanag. Gouzout penaos eo deuet hon Salver gwechall, penaos zoken eo bet esperet gant tud al Lezenn, penaos e teu bepred, penaos e teu endro, gouzout ar penaos n'eo netra. C'hoantaat eo ar pezh a dalv hag a zo d'ober. "Expectantes bestamp spem///. o c'hortoz ar gnanag evurus ha donedigezh an Aotrou"; sed ar c'homzou e a zistro e stumm pe stumm evel leitmotiv an Azvent. Memad implijus : lakaat da sevel ennomp un doare stegn diabarzh war du donedigezh an Aotrou. Gallout a ra dont evel ma kar, ha dont a ra dic'hortozet a-wechoù ; met dont a ra muioc'h c'hoazh hervez ma 'n em zigoromp dezhañ gant ar c'hoant.

(o)

An Hini a zeu eo an heol, ar sklerijenn, an tan. "Mont a ra kuit an noz, ar goulou a dosta" (kentañ sul, abostol). Eñ a ra sklerijenn d'an dalled, Eñ a zistroio evel al luc'hedenn o treuzañ an neñv en un taol-krenn. Ret e vefe amañ teurel ur sel war skeudennadurioù Doue en Testamant kozh dindan arouez an tan. Ur seurt studiadenñ a ziskouezge daou dra talvoudus dimp : Doue eo ar sklerijenn o vleniañ e kreiz an noz, ar golonenn lugernus o ren an Hebreed war du douar ar bromesa ; Doue eo an hini a gastiz, an hini spouronus en em ziskouez war ar Sina e kreiz ta ar c'hurun, prest da zistrujañ ar re zihenchet. Ouzh ar skeuden gentañ e c'hellomp aes stagañ soñj ar messaer, soñj rener ha rou Israel. Ouzh an eil eo kement a zo menoz apokaliptek an tan distrujer, evel e prezegerezh Sant Yann Vadezour : "Eñ ha padez en Spered Santel hag en tan ; ar pell avat, o deviañ a raio en tan na varv ket" (St Mazh. 3,12).

Ar sklerijenn en em ziskoueze eta evel ur galloud a varn : dispartiañ a ra an traou dre ziskouez petra int, dre anataat o disheñvelder. Keit m'emaer en deñvalijenn, n'ouzer ket na pelec' ez eur, ha petra'zo. Doue o tont, a zo barnerezh, sklerijenn ma eo. Ha pep barnerezh a zo daouduiek : didamall ha tamall, gwir rantet ha kastiz dleet, dieubidigezh ha bac'hidigezh. Donedigez Doue a zo diouzh ret daspren ha kondaonidigezh.

(o)

Silvidigezh ha koll a welomp oc'h efedñ war dachenn an du a stroll, pe war dachenn an dud a-unanou.

An dud a stroll, eo poblad Israel o c'hortoz gant gouelvan hag anken, e zaspren diouzh mac'homerezh an Ejipt pe diouzh krizder Assur ha Babulon ; eo ar beorion, an dud izel en Israel o c'harmiñ war du ar justis evita ivez, hag o c'houlenn o frank er gwir. "Bern a raio ar beorion gant justis hag e roio setañ reizh e-keñver tud izel ar vro" (Isahia 11,4) ; eo ar pobloù gwasket hizio c'hoazh evel dec'h o spiañ etrezek tonkadur

gwellloc'h, hag o lakaat da dremen war o diweuz pedennoù birvidik
 Israel. E dreist-holl an Iliz a var n'eo ket echu an Dasprenidigezh
 Dasprenidigezh, keit m'emañ bepred an droug o'hoari war an douar,
 hag o waskañ ar re vat ; eo rouantelezh Doue o c'hortoz hag o
 c'hoantaat fin ar bed, evel leunder trec'h ar C'hrist war ar
 pec'hed hag ar maro (sell. ouzh aviel ar sùh kentañ). Un touell eo
 krediñ e c'hellimp un deiz bennak adsevel amañ ur Baradoz douarel,
 ha skarzhañ kuit an droug. Bepred e vo ar sturm, bepred ar fals
 profeded a-enep ar profed, ha Kristed fals a-enep ar C'hrist. Pep
 urzh kristen amañ ne c'hell bezañ nemet bresk, nemet diglok,
 nemet dibad. Kondanet eo ar bed, ha n'hellimp ket salviañ anezhañ.
 Ha koulskoude, evel pa vez an tan en ti e tenner buan kement a
 c'heller, hon eus da salviañ er bed kement a c'hellomp, hon eus da
 zegas dezhañ ar sklerijenn doueel a zo war un dro silvidigezh ha
 tamall. E kement ha ma klaskomp rouantelezh Doue, emomp dija o
 varn ar bed, hag o trec'h warnañ, emomp dija gant lid ar varn
 diwezhañ. Lizehoù ar Pab o kondañnañ fazioù ha torfedoù hon
 mare, eo dija lid ar varn diwezhañ : Kement a liami war an douar
 a vo ivez liammet en nehoù. Ar C'hrist o kastizañ ar broioù hag
 an dud gant reuzioù ha brezel, eo dija lid ar varn diwezhañ, eo
 bepred donedigezh an Aotrou. Sellit ouzh komzoù ar Werc'hez en he
 gweledigezhioù o tiskleriañ bepred : N'hellan mui herzel ouzh
 brec'h va Mab da skeiñ ... Keit ha n'eo ket deuet c'hoazh diwez
 an droug, gant fin ar bed, e c'hell bezañ diwez un droug, ha
 labour hon daouarn d'ur stad reizhoc'h, ha sec'hed ha naon hon
 ene da vrasoc'h justis. Rak kement-se eo bepred donedigezh an
 Aotrou.

Ennomp-ni hon unan evel war dachenn ar bed, daspren ha
 kondañnidigezh. Ennomp-ni ivez, kement na vez ket adreizhet gant
 sklerijenn an Aotrou a zo dija kondañnet ganti... C'hoantaat an
 Aotrou, goulenn anezhañ, en em zigeriñ dezhañ ... Bepred hon eus
~~knaha~~ tachennoù a chom en diavaez d'e levezon ; n'emañ ket en
 hon droukrañs, en hon diegi, en hol lentegezh en hon taerijenn,
 en hon emgarantez ... Kement-se holl ha n'eo ket tra Doue a zo
 dija kondañnet ennomp ; ha ret eo d'an Aotrou hon skarzhañ, pe a
 gevret ganimp hag aesoc'h e vo pe hepdomp ha gwashoc'h a se
 evidomp. Skarzhañ kuit restachoù ar pec'hed... Purgator ! An
 Azvent eo war an douar Purgator ar Sent, evel ar Purgator war an
 tu all Azvent an Anaon. Tan ar c'hoant ha c'hoant an tan .

Hag evel na c'hell ket daspren an Iliz bezañ kaset da benn he
 fin ha distruj ar bed, ne c'hell ket kennebeut all daspren hon e
 bezañ sevenet hep fin ar bed evidomp, hag hep distruj hor c'horf
 Hor c'hig a dennomp eus Adam, a zo dindan galloud an droug hag
 ar maro, ha ret dimp en em zieubiñ diouzh pep droug ha diouzh pe
 maro. Maro an den a zo ivez ur mister a gondañnidigezh hag a
 zaspren, kondañnidigezh ar c'horf a c'hoantegezh, daspren an ene
 krouet diouzh skeudenn Doue. Ken aes eo dimp difenn ur c'horf
 n'hon eus gwir nemet d'e wallgas hep e lazhañ, ken aes eo mont a
 du gantañ, e keit ma teu an Aotrou evit e varnerezh, e nize
 zisrannerzh, ha ni o chom hep klevout e gammedoù

An Azvent eo Doue o tont. Ha ne c'hell dont nemet evel maz eo, tan puraer, tan skarzher, tan sklerijenner ha dasprener, tan draister ha kastizer. Mister tremenet, pe a vremañ, pe dazont, petra'vern ! En diavaez, pe kentoc'h a-us d'an amzer daoust m'emañ e-barzh an amzer, eo mister donedigezh an Aotrou. Un hevelep gwirionez o'n em ziskouez e mareadoù disheñvel, ha dindan diavaezoù kennus. Un hevelep gwirionez don, ha setu perak e c'hell hon Salver lavarout ne dremenñ ket remziad Judevion e amzer hep na vefe deuet ar mister a-bezh, gant prezegerezh an Iliz ha kastiz Jeruzalem.

Setu perak muioc'h eget biskoazh en em ziskouez skeudenoù bras an Azvent evel patromoù peurbadus d'ar pezh a dremen hag a dremenñ. Kement diogen an Iliz, kement spi, kement dedenn d'ar C'hrist ha d'ar peoc'h. Kement an c'hoant eus puridigezh en Rouantelezh Doue a-us d'ar politikerezh ha d'ar soñjoù bedel, eo bepred Isahie o tiougenañ, hag o kemenn. Evel un Tad Maner, ur Grignon Monforzh, o skeiñ war an douar e gomzoù a dan hag a varnerezh, kement den prizoniet o c'houzañv en abeg d'e desteni, eo Yann o prezeg hag o kelenn. Ha kement ene o 'n em zigeriñ d'ar sentidigezh eo Mari o resev kemenn an Ael ; evel ul leanez o kemer ar vag evit mont d'an Okeania an ober war dro ar re glañv, eo Mari o tiougen ar C'hrist hag o tegas anezhañ d'ar bed. Skeudenoù peurbadus ha mister diheskus.

Mister un dra o tont hag o kreskiñ, evel ur vleunienn a sav betek digeriñ. Mister a yaouankiz, dre maz eo goanag ha ledanidigez Lid yaouankiz an Iliz, gant dason Kanenn ar C'hanennoù, betek tizhout yaouankiz didermen an Aotrou. Marana tha ! Deus, Aotrou Jezuz !